



Senin, 11 Januari 2021

Ogen: Kejadin 15:1-5



Singaloken tading-tadingen



Biasana i bas bulan Januari gerejanta ngelakoken penganangan tahun pelayanenan Gereja. Tahun 2021 enda tema pelayanenta e me kap “anak si nguda jadi pasu-pasu” ngatakensa maka teptep anak bas gerejanta subuk KAKR ras PERMATA e me gereja si genduari ras gereja masa depan. Ikut ia muat bagin i bas dahin-dahin gereja, rikutken talenta ras potensi si lit i bas ia. Tep-tep anak e meherga, sabab e pemere Dibata. Man bana ibereken Dibata pemere si pelain-lain lako banci ipakeken i bas ngelai gereja, keluarga, masyarakat ras sekelewetna. Anak si nguda eme si ngaloken tading-tadingen keluarga ras gereja.

Nulih kita ku bas renungenta maka Abraham ersura-sura ngendesken erta tading-tadingenna man Elieser sierdahinna, sabab tupung e lenga lit pupusna janah ia enggo metua. Tapi nina Tuhan, labo si Elieser si ngaloken tading-tadingenndu, tapi anak si ipupusndu. Tek kal Abraham man Tuhan, tek ia maka Tuhan si mereken anak man bana seh pagi jadi sinursur si mbelin. Tuhan jine netapken maka anak si ipupusna nge pagi singaloken tading-tadingenna aminna anak e lenga tubuh.

Genduari, si ikataken anak i bas jabu labo terjeng anak ni pupus ngenca, lit anak angkat si enggo isahken arah jalur hukum jadi anak i tengah jabu. Anak e pe sah ngaloken tading-tadingen sabab ia enggo ipekuanakken. Alu bage kerina hak anak i bas jabu seri, subuk bas pendidikan, kesehaten, kekelengen, seh ku erta warisen. Bage me mehergana anak ibereken Dibata ku tengah-tengah jabunta. Sura-sura Dibata gelah anak e ipekana-kena, itegu-tegu nandai Dibata, iajari ngelakoken si mehuli, ibere pendidikan nandai talenta ras kengasupenna. Benaken anak-anak nari ibabai ia muat bagin ndahiken dahin kekelengen. Nampati asa ngasupna, umpamana anak si kitik isuruh nirami bunga, muat sampah si lit isekelewetna. Adi PERMATA muat bagin dekorasi gereja, tim IT bas ibadah, pemusik, kolektan, erbahan momo ras sidebanna. I bas PJJ, bere man bana tanggungjawab jadi MC, mabai rende ope kebaktin, muat bagin i bas pertoton sapaat. I bas ia enggo muat bagin, em ikataken anak e enggo jadi pasu-pasu.

